

## TOERPROGRAM

**Opsie 1: RYNVAART EN SWARTWOUD II: 23 April – 03 Mei 2026**

**Opsie 2: RYNVAART, SWARTWOUD EN SWITSERLAND II: 23 April – 08 Mei 2026**

**April**

**Do 23 JOHANNESBURG – AMSTERDAM**

Toerlede wat net die Rynvaart of die Rynvaart in kombinasie met Switserland onderneem, vlieg direk van **Johannesburg** na **Amsterdam** en moet op **23 April** om **19:00** by **KLM** se inweegtoonbank op die **O.R. Tambo-lughawe** aanmeld vir die nagvlug **KL 592** wat om **23:10** na **Amsterdam** vertrek.

**Vr 24 AMSTERDAM**

Met aankoms om **10:15** op Schiphol-lughawe in Amsterdam, wag ons plaaslike bus vir ons. Ons vertrek van die lughawe na die **Zaanse Schans**, 'n karaktervolle woonbuurt aan die Zaanrivier met houthuise en windmeulens uit die 17de eeu – die glorietydperk van hierdie streek. Ons besoek onder andere 'n klompe- en 'n kaasmakery en het tyd om talle ander interessante besienswaardighede te besigtig.

Met aankoms by die boot, **MS France** ontvang u u kajuitsleutel by ontvangs; gaan maak u in u kajuit tuis en verken u tuiste vir die volgende ses nagte. Almal kom voor aandete vir 'n skemerkelkie in die sitkamer bymekaar waar ons deur die kaptein verwelkom en aan die bemanning voorgestel word. Daarna gaan ons na die eetsalon vir ons eerste aandete aan boord van ons 'drywende hotel'.

**Sa 25 AMSTERDAM – KEUKENHOF – AMSTERDAM**

Die hoogtepunt van vandag is ons besoek aan **Keukenhof**, die grootste lentetuin in die wêreld, waar besoekers oor die sewe miljoen bolplante in hul kleurryke blommeprag kan sien – 'n onvergeetlike gesig! 'n Mens kan hier rustig deur die sprokiesmooi lushof stap, die blomme-uitstallings onder dak besoek en tipies Nederlandse verversings soos die bekende Hollandse poffertjies of stroopwafels by een van die stalletjies geniet.

Vanmiddag is u vry om **Amsterdam** op u eie te verken. Die toerleier sal u oriënteer t.o.v. die vele hoogtepunte wat moontlik is, bv 'n opsonele kanaalvaart, 'n besoek aan een van die bekende kunsgalerye of u kan heerlik rondrentel in die omgewing van die Damplein met 'n verskeidenheid van mooi geboue en interessante winkels.

'n Mens móét iets van die polsende ritme van hierdie ou wêreldstad beleef!

Ons keer om **18:00 terug** na die boot wat om **19:00** vertrek en deurnag na Nijmegen vaar.

**So 26 NIJMEGEN – KREFELD**

Die boot meer ongeveer om **06:00** by **Nijmegen** vas, wat aan die Waalrivier ('n vertakking van die Ryn) geleë is. Dit is die oudste stad in Nederland. Die Romeine het meer as 2 000 jaar gelede reeds 'n nedersetting hier gevestig, juis a.g.v. die strategiese ligging met omliggende heuwels en die mooi uitsig op die Waal- en Rynvallei. Die **Lange Hezelstraat** is die oudste winkelstraat in Nederland en is vandag 'n atmosfeerryke voetgangerlaan met 'n verskeidenheid van winkels, straatkafetjies, die Grote Markplein en die 13e eeuse **St Stevenskerk**.

Ná 'n heerlike ontbyt, geniet ons hierdie pragtige ou stad, met sy talle historiese plekke. Dit is ook moontlik om 'n opsonele uitstappie na 'n opelugmuseum van ou plase en boederye, buite Arnhem te onderneem voordat die boot om **13:00** weer vertrek.

Vanmiddag vergader ons in die sitkamer vir 'n lekker saamkuier en informele kenmekaar. Moet dit nie misloop nie! Die toerleiers sal u volledig inlig oor môre se besoek aan Keulen.

Die boot meer vanaand ongeveer om **22:30** in Krefeld vas vanwaar dit môreoggend na Keulen vertrek.

**Ma 27 KEULEN**

Die boot arriveer ongeveer **14:00** in **Keulen**. Keulen is 'n groot stad met baie om te sien en te doen. Ná middagete stap ons as 'n groep onder leiding van die toerleiers na die Domkerk (Unesco-wêrelderfenis). 'n Besoek aan hierdie manjifieke gebou, waaraan byna 700 jaar gebou is, is 'n móét. Die Dom dien ook as oriënteringspunt as iemand dalk verdwaal of verkies om alleen rond te stap.

Die plaaslike toeristekantoor is oorkant die Dom geleë. Die groot winkelstraat naby die Dom is Hohestrasse – 'n voetgangerlaan met talle interessante winkels.

Keulen lê aan weerskante van die Ryn. Agt brûe, waarvan twee spoorwegbrûe is, plus 'n kabelbaan wat die twee oewers verbind. Dié ou Domstad, waarvan 70% in die Tweede Wêreldoorlog verwoes is, is herbou en nou een van die belangrikste handelstede asook die vierde grootste stad in Duitsland.

Ons vertrek vanaand om **22:00** uit **Keulen** na **Rüdesheim**.

## Di 28 ROMANTIESE ROETE – RÜDESHEIM

Vanoggend volg ons die romantiese roete van die Ryn, wat deur Unesco tot 'n Wêrelderfenisgebied verklaar is. Maak seker dat u op die dek of in die sitkamer is sodat u niks mis nie!

Die hoogtepunt vandag is die talle sprokieskastele teen die hange weerskante van die Ryn en die legendariese **Lorelei-rots**. Hou dus u kameras (en notaboekies) byderhand!

Ons meer om **14:30** by een van die mees druk besoekte stadjies langs die Ryn vas: **Rüdesheim!** Hier stap ons deur die bekende Drosselgasse, wat immer woel met besoekers van oral! U kan die Niederwald Denkmal – 'n indrukwekkende monument wat per kabelspoor bereik word – opsioneel besoek.

Hierdie reusagtige monument is opgerig ter ere van die eenheid van Duitsland ná die Frans-Duitse oorlog van 1870/1. Op 'n 25,8 m hoë voetstuk staan die 10,5 m hoë Germania wat weswaarts kyk na waar die destydse Duitse Ryk aan albei kante van die Ryn tot ver in die huidige Frankryk gestrek het. Van hier af het 'n mens 'n ongelooflike mooi uitsig oor die Rynvallei en die stad Bingen op die oorkantste oewer.

Rüdesheim is ook 'n bekende wynstadjie – Karel die Grote het reeds in sy tyd die wyn hier geprys en sterk aanbeveel! 'n Mens kan ook 'n interessante besoek aan die musieksalon met 'n verrassende versameling meganiese musiekinstrumente aflê. Daar is 'n wynmuseum, 'n foltermuseum en buite die stad selfs 'n klooster waar die 60 nonne self hul wingerd tot 'n eksklusiewe wyn verwerk.

## Wo 29 MANNHEIM

Die boot vertrek vanoggend om **04:00** uit Rüdesheim en arriveer ongeveer **12:00** in **Mannheim**, 'n stad in suidwes Duitsland geleë aan die Ryn- en Neckarrieviere.

Mannheim staan bekend as die *Stad van Uitvindings*, omdat die motor, trekker en fiets sy oorsprong hier gekry het. Karl Benz het met die eerste motorvoertuig in 1886 in die strate van Mannheim afgery.

Die stadsplan is uniek in Duitsland omdat die strate en lane in die stadskern in kwadrante verdeel is en aldus benoem is.

Vandag is dit hoofsaaklik 'n industriestad met die grootste binnelandse hawe in Duitsland. Die stad het grootskaalse vernietiging tydens die Tweede Wêreldoorlog ervaar, juis a.g.v. sy belangrike rol in die handel- en bedryfsektor.

Die stad staan ook as 'n kulturele- en musieksentrum bekend.

Na middagete onderneem ons 'n uitstappie na Heidelberg, Duitsland se oudste universiteitstad.

Vanaand sit ons aan vir die Kaptein se Dinee.

## Do 30 STRASBOURG – FRANSE PLATTELAND – TITISEE

Die boot vertrek om **02:00** vanoggend na **Strasbourg**, 'n elegante stad in Frankryk. Ons ontskeep na ontbyt. Ons besoek die stadsplein waar ons die beroemde eentoring-katedraal, ewe mooi van buite en binne, besoek. In u vrye tyd kan u die bekende besoekpunt *Petite France* (Klein Frankryk) te voet verken. Hier ontdek 'n mens iets van die Franse sjarme en kultuur, omring deur eeue-oue geboutjies en straatjies.

Ons ry vandag per bus met die Alsace-wynroete na pragtige Franse dorpie o.a. **Riquewihr** wat op die lys van Frankryk se mooiste dorpie pryk. Ons kry geleentheid om die Franse platteland eerstehands te ervaar, soos die tipiese wyn en cuisine van die streek. Na 'n voldag in die Franse omgewing, reis ons na **Titisee** in die hart van die Swartwoud, waar ons twee nagte oorslaap.

## Mei

### Vr 01 TITISEE – SWARTWOUD

Ná ontbyt het ons geleentheid om meer van die **Swartwoud** te beleef. Ons ry verby indrukwekkende valleie, dale, digbeboste berge en tipiese plaashuise. Ons besoek o.a. **Triberg**, waar die hoogste waterval in Duitsland (163 m) bruisend oor sewe rotsbloktappe na benede stort. Dit is 'n besondere buitelig ervaring wanneer 'n mens 'n entjie bergop stap om die waterval te sien. 'n Minimale toegangsfooi is betaalbaar.

Later keer ons terug na die skilderagtige **Titisee**, wat aan 'n lieflike meer geleë is. Die talle luukse hotelle, baie winkels en lieflike omgewing naby Feldberg maak van Titisee 'n gesogte vakansie- en ski-oord. Die Swartwoud is ook die geboorteplek van skisport in Duitsland. Ons geniet vanaand weer aandete in die hart van die Swartwoud.

#### **Sa 02 TITISEE – ZÜRICH/BEATENBERG**

Na ontbyt vertrek ons na Zürich-Lughawe om almal wat opsie 1 gedoen het, by die lughawe af te laai. Aansluitingsvlug **AF 1615** vertrek om **14:35** en arriveer om **15:55** in Parys. Vlug **AF 990** vertrek om **21:35** na Suid Afrika. Op pad besoek ons die Rynvalle. Die res van die groep (opsie 2) besoek ook **Luzern** op pad na **Beatenberg** – 'n Switserse dorpie teen die Niederhornberg.

Die hotel waarin ons tuisgaan, bied 'n pragtige uitsig oor die Thunmeer en Switserland se drie beroemde bergspitse: die Jungfrau, Eiger en Mönch.

#### **So 03 JOHANNESBURG**

Aankoms op die **O.R. Tambo-lughawe** in **Johannesburg** (opsie1 ) ná 'n verrykende droomtoer.

### **OPSIE 2**

#### **Sa 02 – Do 07 Mei**

#### **BEATENBERG (Sien OPSIONELE DAGTOERE IN SWITSERLAND vir meer besonderhede oor die uitstappies)**

Gedurende ons verblyf in Switserland ondereem ons opsionele uitstappies na van die mooiste plekke in hierdie sprokiesland.

U kan op u eie teen die Niederhorn opgaan of gratis en na willekeur met die munisipale bus tussen Beatenberg en Interlaken reis. Die Niederhorn bied 'n ongelooflike uitsig oor die Thunmeer.

Interlaken self is 'n pragtige dorp. Daar is talle winkels waar 'n mens interessante en eg Switserse aandenkings kan koop. Die toerleiers sal al die verskillende opsies aan u verduidelik.

#### **Do 07 BEATENBERG - ZÜRICH**

Ons vertrek vandag per bus na Zürich vir ons aansluitingsvlug **AF 1615** na Parys wat om **14:35** vertrek. Vlug **AF 990** vertrek om **21:35** van Parys na Suid-Afrika.

#### **Vr 08 JOHANNESBURG**

Ons land vanoggend om **08:10** op **OR Tambo-lughawe** met mooi herinneringe en baie nuwe vriende.

***LW:** Weens omstandighede buite ons beheer kan dit gebeur dat die toerprogram aangepas moet word*

### **OPSIONELE DAGTOERE IN SWITSERLAND**

Vanaf Beatenberg kan toerlede interessante opsionele toere onderneem om die mooiste dele van Switserland behoorlik te leer ken. Hierdie toere word, met inagneming van die weer, vooraf beplan en uitgewerk. Die opsionele toere word die vorige aand deur almal wat wil saamgaan bespreek. Diegene wat nie 'n spesifieke dag se uitstappie wil meemaak nie, is vry om een van die vele wandelpaaie te verken of korter uitstappies op hul eie te onderneem.

#### **SCHILTHORN**

Ons ry per trein deur die Lauterbrunnendal, waar talle watervalle hoog uit die Alpe in die pragtige nou dal neerstort, na Stechelberg en van daar per kabelkar na Schilthorn (2 970 m). Bo op die berg kan 'n mens rustig rondstap, die skiërs dophou of smaaklike verversings in die draaiende restaurant geniet. 'n Mens kan en wil letterlik net bly kyk en kyk en kyk! Dis werklik die heel mooiste panorama oor die Alpe – onbeskryflik!

Op pad terug besoek ons die indrukwekkende Trummelbachval – die grootste gletserwaterval in die Alpe – waar duisende liters water per sekonde hul weg binne-in die berg uitkalwe en met donderende geweld na benede stort.

#### **JUNGFRAU**

'n Besoek aan die 3 454 m hoë Jungfraujoch is letterlik en figuurlik een van die hoogtepunte van 'n besoek aan Switserland. Die Jungfrau, Koningin van die Berge, spog met die hoogste spoorwegstasie in Europa. Die treinrit vanaf Lauterbrunnen tot by die "Joch" duur sowat 2 uur – 'n besonder mooi en indrukwekkende rit. Van daar het 'n mens 'n asemrowende uitsig oor die omringende bergwêreld, asook op die 26 km lange Aletschgletser – die langste van sy soort in die Alpe en verstaanbaar genoeg 'n Unesco-wêrelderfenisgebied.

'n Verdere indrukwekkende belewenis is 'n besoek aan die ondergrondse yspaleis, 20 m diep in die gletser uitgekop. 'n Mens kan ook die koue trotseer en 'n entjie op die soliede ys gaan stap – 'n besondere ervaring!

## THUN

Een van die mees gesogte opsionele toere is die pragtige bootvaart vanaf Beatenbucht na Thun.

Die boot vaar heen en weer tussen albei oewers van die Thun-meer en doen by verskillende dorpieë aan om passasiers op en af te laai. Die besoek aan die stad Thun, met 'n unieke Middeleeuse karakter en bruisende Aare-rivier wat deur die stad stroom, is 'n fees vir enige besoeker. Dit is 'n stad met heerlike inkopie-moontlikhede en geleentheid vir 'n besoek aan die imposante ou kasteel wat bo die stad uittroon.

## GRIMSELPAS EN AARESCHLUCHT

Ons ry al langs die pragtige diepblou Brienz-meer deur klein Switserse dorpieë, knus geleë aan die oewer van die meer, tot by Meiringen: die stadjie van Sherlock Holmes. Die toerleiers sal die verhaal vir u vertel en die standbeeld vir u uitwys.

Ons besoek die Aareschlucht oftewel "Kloof van die Aare", waar die Aare-rivier deur die eeue heen 'n kloof van nagenoeg 1 400 m lank en 200 m breed in die kalksteenrotse uitgespoel het. Dit is 'n aangrypende natuurwonder!

## LUZERN

'n Besoek aan Luzern is altyd baie opwindend. Die stad is pragtig geleë aan die oewers van die Reuss-rivier aan die noordwestelike punt van die Vierwaldstättersee (Vierwoudstrekemeer) en aan die voet van Pilatusberg, wat bo die stad uittroon. Luzern is 'n uitnemende toeristestad omdat hier so baie besienswaardighede is, onder meer die beroemde Leeu-monument, handelsmerk van Luzern en die indrukwekkende Gletsertuin en -museum. Die interessante spieëldoolhof wat tot veel pret aanleiding gee en waar 'n mens net móét inloer, is ook hier.

Die Bourbaki Panorama – 'n aangrypende reuse skildery van ongeveer 40 m in deursnee – beeld die oorgawe van die Franse leër ná 'n veldslag uit. Dis beslis 'n besoek werd. Die Kuns- en Kongreshuis langs die stasie huisves Switserse kunswerke uit die 15de tot die 20ste eeu asook moderne Europese skilderwerk.

'n Besoek aan Luzern is nie volledig voordat 'n mens oor die bekende voetgangerbruggie, die Kapellbrücke, met geskiedkundige dakskilderye en 'n agtkantige Wasserturm (watertoring) stap nie. Die pragtige wit en pienk marmer Jesuïete-kerk, nie ver daarvandaan nie, is een van die mooiste kerke in Europa.

Vir die stapliefhebbers is daar stapgeleentheid al langs die meer of na die interessante en geskiedkundige Zeitturm-klok in die ou stadsmuur, wat altyd 'n minuut voor die ander klokke sy melodie oor Luzern uitbeier.

Luzern is 'n kopersparadys vir diegene wat graag iets besonders wil aanskaf. As jy die horlosie van jou drome soek, sal jy dit beslis hier kry!

Gelukkig is hierdie uitstappie deesdae ingesluit van die Swartwoud op pad na Beatenberg. Die enigste ekstra uitgawes is die Gletsjer- en die Bourbakimuseum, vir die wat belangstel.

## UITSTAPPIES WAT TOERLEDE OP HUL EIE I.P.V. OPSIONELE DAGTOERE KAN ONDERNEEM:

### BEATENBERG

Beatenberg, waar ons nege nagte tuisgaan, is 'n tipiese Alpe-dorpie, idillies geleë op 'n lang, smal plato teen die Niederhorn (1 950 m) met 'n asemrowende uitsig op die Thun-meer en die Alpe, insluitend die Eiger (3 970 m), Mönch (4 099 m) en Jungfrau (4 158 m). Daar is pragtige stapmoontlikhede in Beatenberg. Indien die kabelspoor al ná die winter oopgestel is, kan 'n mens die Niederhorn bestyg. Dit is 'n pragtige gesig! Dit is moontlik om 'n tandem-vlerksweefsprong (*hang-gliding*) van hier af in die pragtige dal te doen. 'n Besoek aan die Beatusgrotte, wat in prehistoriese tye reeds bewoon was, is die moeite werd. U kan ook 'n uitstappie na 'n eg Switserse boerdery in Beatenberg onderneem.

### INTERLAKEN

Dié pragtige en karaktervolle stadjie lê in die hart van die Bernese Voor-Alpe aan die voet van die Jungfrau, tussen twee mere: die Thun en Brienz. "Interlacus" beteken "tussen die mere". Die Aare-rivier wat deur die stad stroom, verbind die mere. Interlaken is 'n lewendige, gesellige toeristestad met pragtige parke en promenades langs die rivier. Dit bied goeie inkopie-moontlikhede en interessante besoekplekke. Pryse vergelyk baie goed met enige ander Switserse stad.

Fietse kan ook in Interlaken gehuur word om die omgewing mee te verken.